

海寧王靜安先生遺書

八

臺灣社會與文化

卷一

觀堂集林卷第十八

史林十

海甯 王 國維

商三句兵跋

商句兵三出直隸易州今歸上虞羅叔言參事其一銘曰大祖
日己祖日丁祖日乙祖日庚祖日丁祖日己祖日己其二曰祖
日乙大父日癸大父日癸中父日癸父日癸父日辛父日己其
三曰大兄日乙兄日戊兄日壬兄日癸兄日癸兄日丙凡紀祖
名父名六兄名六三器之文蟬媽相承蓋一時所鑄曩見吳
縣吳憲齋中丞所藏一戈有乙癸丁三字不得其解以此三器
例之蓋亦祖父之名矣所云大祖大父大兄皆謂祖父兄行之
最長者大父即禮喪服經及爾雅釋親之世父古世大同字如
世子稱大子世室稱大室則世父當稱大父非後世所謂王父

也其器出易州當為殷時北方侯國之器而其先君皆以日為名又三世兄弟之名先後駢列皆用殷制蓋商之文化時已沾溉北土矣嘗讀山海經紀王亥有易事恆以為無稽之說及讀殷人卜辭見有王亥王恆諸名乃知楚辭天問中該秉季德一節實紀殷之先祖王亥王恆及上甲微三世之事與山經竹書相表裏二書言王亥託於有易天問作有狄古者易狄同字有狄即有易蓋商自侯冥治河已徙居河北遠至易水左右逮盤庚遷殷又從先王故居則今易州有殷人遺器固不足怪往者嘉興沈乙庵先生語余箕子之封朝鮮事非絕無淵源頗疑商人於古營州之域夙有根據故周人因而封之及示以此器拓本先生又謂北史及隋書高麗傳之大兄或猶殷之遺語乎此說雖未能證實然讀史者不可無此達識也因附記之

北伯鼎跋

彝器中多北伯北子器不知出於何所光緒庚寅直隸涑水縣張家窪又出北伯器數種余所見拓本有鼎一自一鼎文云北伯作鼎自文云北伯攷作寶尊彝北蓋古之邶國也自來說邶國者雖以為在殷之北然皆於朝歌左右求之今則殷之故虛得於洹水大且大父大兄三戈出於易州則邶之故地自不得不更於其北求之余謂邶即燕鄘即魯也邶之為燕可以北伯諸器出土之地證之邶既遠在殷北則鄘亦不當求諸殷之境內余謂鄘與奄聲相近書雒誥無若火始燄燄漢書梅福傳引作毋若火始庸庸左文十八年傳閭職史記齊太公世家說苑復恩篇均作庸職奄之為鄘猶燄閭之為庸矣奄地在魯左襄二十五年傳魯地有弇中漢初古文禮經出於魯淹中皆其證也邶鄘去殷雖稍遠然皆殷之故地大荒東經言王亥託于有易而泰山之下亦有相土之東都自殷未有天下時已入封域

又尚書疏及史記索隱皆引汲冢古文盤庚自奄遷于殷則奄又嘗為殷都故其後皆為大國武庚之叛奄助之尤力及成王克殷踐奄乃封康叔於衛封周公子伯禽於魯封召公子於燕而太師採詩之目尚仍其故名謂之邶鄘然皆有目無詩李札觀魯樂為之歌邶鄘衛時猶未分為三後人以衛詩獨多遂分隸之於邶鄘因於殷地求邶鄘二國斯失之矣

散氏盤跋

此盤銘中多國名地名前人有為之說者余以為非知此器出土之地則其中土地名無從臆說也顧此器出世已踰百年世絕無知其淵源者即近出之散伯敦矢王尊亦然嗣讀克鼎銘其中地名頗與此盤相涉如此盤云至于堆莫鬻井邑田又云至于井邑克鼎則云錫女井家（爾）田于（口）又云錫女井（邑）使（爾）人又云錫女井人奔于（彙）知此盤出土之地距克鼎出土

之地必不遠而克鼎出較後器較鉅世當有知之者訪之十餘年莫能答庚申冬日華陽王君文燾言頃聞之陝人言克鼎出處在寶雞縣南之渭水南岸此地既為克之故虛則散氏故虛必距此不遠

呂與叔考古圖有散氏敦云出於乾之永壽

因知散氏者即水經渭水注大散關

大散嶺之散又銘中瀍水即渭水注中之扞水周道即周道谷大沽者即漾水注之故道水岡即衙嶺山間之高地也其諸地之總名銘中謂之虡首目下文云用大戮散氏邑乃即散用田虡末結上文云正虡夫舍散田是虡乃諸地之大名其字向無確釋案吳縣潘氏所藏益公敦有𡗗字其文曰佳王九年九月甲寅王命益公征𡗗寇益公至告一月𡗗寇至見獻帛云云余謂𡗗字從目虡字從頁其意相同當是一字益公敦𡗗寇連言亦土地或種族之名與此盤之虡當是一地𡗗即古文眉字篆文作眉從尸即尸之變化虡亦眉之異文與𡗗同意古器眉壽

字多作𡙇𡙇等形𡙇即古疊字之省與眉聲陰陽對轉𡙇字即
 以之為聲然則𡙇𡙇亦同字𡙇者象形字𡙇者形聲字也古眉
 微二字又通用少牢饋食禮眉壽萬年古文眉為微春秋左氏
 傳莊廿八年築鄆公穀二傳作築微由是觀之𡙇𡙇當即周初
 之微人周書牧誓及庸蜀羌髳微盧彭濮人立政夷微盧烝向
 不知微所在殆即此盤之𡙇及益公敦之𡙇寇也其種族一部
 早移居於渭水之北故漢右扶風有鄆縣詩大雅申伯信邁王
 賡于鄆則宗周時已有此地蓋因此族得名然其本國固在南
 山當作此盤時已為大散諸國所役屬矣又據此盤所紀地理
 觀之則大在散東井在大散二國閒而少居其北大分井地與
 散而克亦得井田此時亦已無井國矣此器地理本無可考今
 由克鼎出土之地推考之如此其餘諸小地當盡在數十里閒
 古今異名寧從蓋闕矣

克鐘克鼎跋

觀克鐘克鼎出土之地并克鼎中錫土之事克之疆域蓋遠矣
克器出於寶雞縣南之渭水南岸殆克之所都其地南鄰散氏
蓋古之井地也然其他邑又遠在渭北北至涇水殆盡有豳國
故地鼎銘云錫女田于溥原此即公劉所瞻之溥原也鐘銘云
王親命克適涇東至于京師豳在涇側自豳至京師自應循涇
水而下則涇水之旁當有克都而其他都乃在渭南詩稱篤公
劉于豳斯館涉渭為亂克之封地乃與古公劉同矣

鑄公簠跋

簠云鑄公作孟妊車母媵簠孟妊蓋鑄公之女故為之作媵器
然則鑄妊姓之國也樂記武王克殷封黃帝之後於祝鄭注云
祝或為鑄呂氏春秋慎大覽亦云封皇帝之後於鑄古鑄祝同
字晉語黃帝之子二十五宗其得姓者十四人為十二姓任居

其一鑄為任姓其為黃帝後之祝信矣古祝音又與州同春秋
左氏及公羊傳之州吁穀梁傳作祝吁說文解字弔从四从州
聲讀若祝是鑄公即祝公亦即州公矣春秋桓五年州公如曹
左氏傳作淳于公蓋州故都淳于後淳于入於杞州乃西遷左
氏傳襄二十三年臧宣叔取于鑄杜注鑄國今濟北蛇邱縣續
漢書郡國志濟北國蛇邱縣有鑄鄉城蓋其後遷之地此器出
於齊東或猶是都淳于時所鑄歟

淳于在今山東青州府安邱縣境光緒初青州出鑄
子叔黑頭所作鼎蓋諸器是亦鑄州為一之證矣

夜雨楚公鐘跋

夜雨楚公鐘宋趙德父金石錄及王復齋鐘鼎款識冊已著錄
乙卯冬見於滬肆為上虞羅冬事所得作鐘者為楚公步瑞安
孫仲頌比部以為即史記楚世家之熊罾罾本从步二字形聲
皆相近其說不可易矣此器趙氏金石錄謂出鄂州嘉魚縣復
齋款識引石公弼云政和三年武昌太平湖所進武昌嘉魚南

境相接蓋出二縣間矣案楚世家言熊繹居丹陽至文王熊貲始都郢中間無遷都事惟言周夷王時熊渠甚得江漢間民和乃興兵伐庸楊粵至於郢乃立其長子毋康為句亶王中子紅為郢王少子執疵為越章王皆在江上楚蠻之地熊渠卒子熊摯紅立後六世至熊罥今熊罥之器出於武昌者武昌即郢蓋熊渠之卒熊摯紅即中子紅雖嗣父位仍居所封之郢不居丹陽越六世至熊罥猶居於此故有其遺器楚之中葉曾居武昌於史無聞惟賴是器所出地知之耳

郢鐘跋

郢鐘銘郢昭曰余畢公之孫郢伯之子前人多釋郢為茗然郢鍾十二枚均出山西滎河縣漢后土祠旁河岸中非茗器明甚余謂郢即春秋左氏傳晉呂甥之呂也呂甥一云瑕呂飴甥一云陰飴甥瑕呂陰皆晉邑呂甥既亡地為魏氏所有此郢伯

邵陽案皆魏氏也史記魏世家晉文公命魏武子治於魏生悼
子悼子徙治霍生魏絳司馬貞索隱引世本居篇亦云魏武子
治魏悼子徙霍魏於漢為河東郡河北縣霍於後漢為河東永
安縣劉昭續漢書郡國志永安縣下注引博物記曰有呂鄉呂
甥邑也元和郡縣志河東道晉州霍邑縣下云呂坂在縣東南
十里有呂鄉晉大夫呂甥之邑也唐武德中置呂州取名於此
是霍與呂相距至近悼子徙霍或治於呂故遂以呂為氏魏錡
稱呂錡錡子魏相亦稱呂相亦稱呂宣子皆其證也世本王侯
大夫篇尊悼子一代史記亦不載悼子之名余謂呂錡即悼子
服杜注左氏以錡為魏犢子杜氏又以絳為錡子史記則云武
子生悼子悼子生絳二說正同雖武子之子尚有魏顥然錡於
鄆陵之役射楚王中目退而戰死尤與悼之謚合也魏氏出於
畢公此器云畢公之孫邵伯之子其為呂錡後人所作彰彰明

矣顧呂在永安即今霍州此器出滎河者蓋春秋時魏氏米地實奄有

河東之半自河北春秋前魏國故地以北永安以南安邑以西西訖於河皆

魏地也故魏壽餘偽以魏入秦而魏顓亦敗秦師於輔氏今滎

河為漢之汾陰縣地介永安與河北之間魏氏之器出於此固

其所也銘中畢公舊釋戴公或釋翼公然其字作鼎與畢仲敦

之畢桴伯敦之畢正同其从升者殷虛卜辭畢字或从又作

殷虛書契前編卷五第十四葉从升與从又同意說文蕭蕭二字皆从升知華可作蕭

矣以人地二名互證則邵為呂錡之呂無疑

今滎河縣古蓋有呂名呂氏春秋淮南均言古者龍門未開呂

梁未發河出孟門大溢逆流高誘二書注均謂呂梁在彭城呂

縣酈氏水經注又以離石之呂梁當之胡氏禹貢錐指則曰呂

梁即禹貢之梁山龍門之南山也尸子呂氏春秋淮南皆先言

龍門次言呂梁其為夏陽之梁山無疑案夏陽梁山正與今滎

河縣隔河相望蓋魏氏初治霍州之呂故稱呂氏後徙汾陰仍號汾陰為呂如晉遷新田仍號為絳也汾陰夏陽間本古河津因謂之呂梁其地適有梁山於是梁山亦蒙呂梁之名矣

邾公鐘跋

此鐘舊藏吳縣潘氏後歸端忠敏今藏烏程張氏其銘曰陸蠡之孫邾公釵異其吉金自作禾鐘蠡字自來無釋余謂此字从

虫 蠡聲

章古
鼎字

以聲類求之當是蠡字陸蠡即陸終也大戴禮帝繫

篇陸終娶於鬼方氏鬼方氏之妹謂之女隤氏產六子其五曰安是為曹姓曹姓者邾氏也史記楚世家語同其說蓋出於世本此邾器而云陸蠡之孫其為陸終無疑也

殷虛卜辭有𩇑字从鬲蠡聲余因此器蠡作蠡因釋為融字古韻東冬二部之分合久無定論今冬部之蠡融乃并以東部之蠡為聲可為古韻學家添一有力之證據也

適敦跋

此敦稱穆王者三余謂即周昭王之子穆王滿也何以生稱穆王曰周初諸王若文武成康昭穆皆號而非謚也殷人卜辭中有文祖丁即文武祖乙即武康祖丁即康周書亦稱天乙為成湯則文武成康之為美名古矣詩稱率見昭考率時昭考書稱乃穆考文王彝器有周康邵宮周康穆宮則昭穆之為美名亦古矣此美名者死稱之生亦稱之書酒誥首王若曰釋文云馬本作成王若曰注云言成王者未聞也俗儒以為成王骨節始成故曰成王或曰以成王為少成二聖之功生號曰成王沒因為謚衛賈以為戒康叔以慎酒成就人之道也故曰成此三者吾無取焉吾以為後錄書者加之未敢專從故曰未聞也案馬所云俗儒謂今文歐陽大小夏侯三家是酒誥首句三家今文并衛賈馬古文皆作成王若曰又顧命越翌日乙丑王崩釋文云馬本

作成王崩漢書律歷志白虎通崩薨篇引顧命皆同史記魯世家周公曰吾成王之叔父又云必葬我成周以明吾不敢離成王是成王乃生時之稱此敦生稱穆王即其比矣內府藏獻侯器尊其銘曰惟成王大□在宗周王賁獻侯器貝用作丁侯寶尊彝是為生稱成王之證矣考古圖所錄載敦曰穆公入右載博古圖所錄敦曰武公入右敦此皆生而稱穆公武公是周初天子諸侯爵上或冠以美名如唐宋諸帝之有尊號矣然則謚法之作其在宗周共懿諸王以後乎

庚嬴貞跋

歸安吳氏藏貞銘曰王格于庚麟宮舊釋庚罷余謂此字从貝从嬴當是嬴字假為女姓之嬴上虞羅氏藏一鼎銘云魯氏作寶鼎字亦从貝惟荀伯大父簋有𣪠字𣪠君盠有𣪠字則徑作嬴春秋左氏宣八年經夫人嬴氏薨葬我小君敬嬴公穀嬴並

作熊觀於鼎卣二器可知羸熊相混之故矣

齊國差蟾跋

蟾銘云國差立事歲咸丁亥日照許印林瀚跋此器以為古人用干支紀歲實始於此余謂非也齊器多兼紀歲月日如子禾子釜云□□立事歲櫻月丙午陳猷釜云陳猷立事歲巖月戊寅此器云國差立事歲咸丁亥文例正同但咸下奪一月字耳前二器當讀么么立事歲為句么月為句丙午戊寅為句此器亦然云國差立事歲者紀其年也古人多以事紀年如南宮方鼎云惟王命南宮伐反虎方之年克鼎云王命克舍命于成周適正八吉之年皆是咸者其月也櫻月巖月咸月蓋月陽月陰之異名齊人之語不必與爾雅同也丁亥者其日也古人鑄器多用丁亥諸鐘銘皆具證也然則自漢以前實無用干支紀歲之事許說失之至阮文達據甲午盭謂秦始以干支紀年則誤